

BH Isnin, 27 Ogos 2018

Ms.17

MASYARAKAT

[FOTO ZUNNUR AL SHAFIQ /BH]



Nurul Izzah (tengah) bersama Kamal Nasharuddin (kiri), Agileswari (dua dari kiri), Muaz Mohamed dan Sarah Adiba (kanan) pada program Borak Kopitiam di Sri Pentas, semalam.

Ijazah '14 tahun' untuk Nurul Izzah

➔ Peroleh kejutan selepas terlepas majlis konvokesyen UNITEN

Oleh Syalikhha Sazili dan Ain Radhi
cnews@nstp.com.my

► Kuala Lumpur

Ahli Parlimen Permatang Pauh, Nurul Izzah Anwar, menerima kejutan 'majlis konvokesyen' sebagai bekas pelajar Universiti Tenaga Nasional (UNITEN) selepas terlepas peluang itu, 14 tahun lalu.

Kejutan itu dilakukan oleh kru rancangan *Borak Kopitiam* sebagai sebahagian daripada sesi perkenalan pihak TV3 bersamanya ketika program bual bicara itu disiarkan secara langsung di Sri Pentas, pagi semalam.

Rancangan yang dihoskan oleh Muaz Mohamed dan Sarah Adiba Yusof, dimulakan dengan soalan santai seperti hobi, fesyen dan masakan kegemaran Nurul Izzah sebelum rakaman video beliau menuntut di UNITEN sejak 2000 ditayangkan.

Selepas tayangan video itu, beliau dikejutkan dengan kedatangan Naib

Canselor UNITEN, Datuk Prof Dr Kamal Nasharuddin Mustapha dan Timbalan Dekan Universiti Prof Dr Agileswari K Ramasamy yang turut menghadihkan cenderahati penghargaan kepadanya sebagai alumni universiti yang berjaya dan berkaliber.

Terharu terima kejutan

Nurul Izzah yang pernah mengikuti pengajian di peringkat Ijazah Sarjana Muda Kejuruteraan Elektrik dan Elektronik di UNITEN, dilihat terharu dengan kejutan itu.

Katanya, tarikh majlis konvokesyen beliau itu mengingatkan kepada peristiwa pembebasan Ketua Umum PKR, Datuk Seri Anwar Ibrahim pada 2 September 2004, selepas hampir enam tahun menjalani hukuman penjara.

"Ini saat yang manis memandang saya menjalani konvokesyen pada hari pembebasan Anwar Ibrahim selaku tahanan politik dipenjara. Maksudnya beliau dibebaskan pada 2 September, hari konvokesyen pada 4 September.

"Ia mengingatkan saya pada saat itu termasuk tenaga pengajar di UNITEN yang banyak menabur bakti bagi memastikan saya berjaya menamatkan pengajian.

"Mendengar kata-kata (pensyarah) ia berharga buat saya dan saya puji usaha *Borak Kopitiam* yang berjaya cari gambar saya

yang 'selebet' (comot)," katanya selepas menghadiri program *Borak Kopitiam* di saluran TV3.

Selain menimba ilmu kejuruteraan di UNITEN beliau turut menguasai kemahiran dan teknik parkir yang hebat.

"Saya rindu zaman universiti kerana ia saat yang sangat sentimental selain saya juga belajar 'reverse parking' (meletak kenderaan secara mengundur)," katanya berseloroh.

Naib Presiden PKR itu juga berkata beliau memilih universiti tempatan sebagai pilihan utama sebagai melaksanakan dasar yang dibawa bapanya, yang ketika itu memegang jawatan Timbalan Perdana Menteri.

UNITEN beri peluang

"Ketika itu Anwar dipenjarakan dalam kes pendakwaan yang bermotifkan politik, jadi sudah tentu saya dihalang untuk ke universiti tempatan. Saya berenang air mata kerana berdepan kesukaran ini.

"Banyak universiti tempatan berasakan ada tekanan politik namun UNITEN memberi saya peluang untuk melanjutkan pelajaran," katanya.

Sementara itu, Kamal Nasharuddin, turut menyanjung kehebatan Nurul Izzah ketika menuntut di universiti berkenaan yang disifatkan bukan sahaja pelajar cemerlang malah bakat kepemimpinannya cukup terserlah.